

Date – 24/01/2026

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Mizorama ruihhlo dona kalpui dan thlirletna hun leh kalpui chhunzawm dan tur relin Chief Minister Pu Lalduhoma kaihhruaiin vawiin khan a office ah an thukhawm.
2. MNF Party chuan, ZPM sorkara Mizorama ram lei chungchanga thil diklo lian ber thleng chu CBI chhui tir ngei ni se an ti.
3. Prime Minister Narendra Modia chuan vawiin khan Rozgar Mela-ah sawrkar department hrang hranga hna hmuhthar thalai mi sing 6 leh sang 1 chuangte hnenah vawiin hian appointment letter a hlan
4. Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn.

<><><>

CM

Mizorama ruihhlo dona kalpui dan thlirletna hun leh kalpui chhunzawm dan tur relin Chief Minister Pu Lalduhoma kaihhruaiin vawiin khan a office ah an thukhawm a,

Chief Minister Pu Lalduhoma chuan ruihhlo do kawnga chak zawka hmalak a nih theih nan Mizoram sawrkar chuan December 2024 khan Saitual, Khawzawl leh Hnahthialah Excise & Narcotics Station a hawn thu te, rel luhna Sairang leh Bairabi ah Excise station hawn phalna peihfel a nih bakah March ni 14, 2025 khan Excise & Narcotics department-a thawktute chetvelna tur lirthei 18 lei a nih bakah indaih lohna zualpui phuhruk nan Mizoram Sawrkar atangin LMV pathum ruahman a nih thu a tarlang bawk a ni. Chief Minister chuan Excise & Narcotics Department-a thawktute indaihlohna phuhruk nan Post 16 siam thar a nih thu sawiin Direct recruitment hmangin mi 28 lak an nih tawh bakah mi 39 la leh turin inbuatsaihna a kal mek thu a sawi a. Kum 2025 chhung khan ruih theih thil chi hrang hrang kaihhnawih ah case 319 ziah luh a nih thu a sawi.

Pu Lalduhoma chuan ruihhlo chu hnam hmelma lian ber a nih angin a do kawngah pawh Sawrkar leh khawtlang tanrual a pawimawh a ti a. Mizorama ruihhlo lo lutte dan chah a nih theih nan Home Department, Excise & Narcotics leh Central YMA-te tangkawp chuan, kum 2025 September ni 1 khan ramri hrul khaw 22-ah Operation Jerico kalpui a nih thu a sawi a. Nikum September ni 1 kumin ni 13, 2026 chhunga ruihhlo man tawh zat hlut zawng chu Cheng Vbc. 196 leh nuai 42 a nih thu a sawi bawk a ni.

He meetingah hian Home Minister Pu K.Sapdanga chuan ruihhlo do kawnga Excise & Narcotics Department tha tichak tura Home Department bakah Central YMA tha thawhna chuan awmzia a neih thui hle thu a sawi a. Aizawl mai bakah District hrang hranga ruihhlo tih remna tura Sawrkar an thawhpui thinna ah lawmthu a sawi baw k a ni.

Central YMA Gen Secy Prof. Malsawmlianatarlan danin December ni 10, 2025 khan kumpulan hawnna hun hman a ni a. Police-te nen tangrualin, December ni 10, 2025 leh January ni 12, 2026 chhung khan ruihhlo ngai, khawlaia tei rawlai mi 192 khawm niin Home-ah mi 85 dah luh an ni. Central YMA hnuaiah January ni 20, 2026 khan Central Anti Drugs Squad 24 din a ni a, hengte hian Aizawl khaw chhung Zone 10-a thente chu an vil thin dawn a ni.

Vawiin thutkhawmah hian ruihhlo ngaite enkawl a, eizawnna tlak thiamna an neih theihna turin Home awmsa thenkhat thawmthat dan turte sawi ho a ni a. Ramri hrul, ruihhlo luh tamna hmun a ngaih ahte Outpost siam belh dan tur rel a ni baw k.

<><><>

MNF PARTY LENGPUI AREA

MNF Party chuan, ZPM sorkara Mizorama ram lei chungchanga thil diklo lian ber thleng chu CBI chhui tir ngei ni se an ti.

Vawiin khan MNF Tresurer Pu Lalruatkima chuan Aizawl Press Club-ah Lengpui ram hralh chungchang hi chanchinbu mite hrilhin, Indian Airforce hnena Lengpui ram hralh anih tur thu sorkarin Dan ang taka hriattirna, Preliminary Notification a tih chhuah atanga ni 70 chhung lekin ram neitu dik tak pawh ni lo, a buaipuitute kutah cheng vbc. 188 zet pek chhuah vek hman a ni a, ram lak kalpui dan chak ber record a nih a rinawm a ti

Pu Lalruatkima chuan, hmanhmawh taka ram hralh anih theihna tura Social Impact Assessment kal kan phalna Exemption dilna pawmpui tu chu Revenue Minister Pu B Lalchhanzova a ni tih sawiin ram lak tur chungchang hi Preliminary Notitication' kum 2025 May ni 15 khan tihchhuah a ni a, Lengpui ram hralh hi ZPM sokarin a hriatpui a ni mai lova, Minister pawmpuina ngeia hralh tura hmanhmawh taka hmalak a ni a ti. Sorkar ram lakna Dan hnuaiah ram leitu chu sorkar a nih zel avangin Lengpui ram hralhtu pawh hi ZPM sorkar ngei a ni a. Chief Minister Adviser chuan mipui hmaah hre reng chungin thu dik lo a sawi lui a ni a ti.

Pu Lalruatkima sawi danin, Lengpui-a ram neitu mi 8 te hmingin ram leina man, Compensationhi siam a ni a, heng ram 8 te leikhawmtu nia insawi Pu Rohmingliana hnenah Aizawl DC Office chuan nikum July ni 25 leh Aug ni 26 ah a belhkhawmin cheng vbc 70 a pe chhuak a, abak zawng cheng vbc. 117 leh nuai 90 zet chu ram neitu ni ve miah lo, a buaipuitu nia sawi, Pu Henry Lalremsanga Hlawnmual hnenah nikum July ni 25 khan pek vek a ni a. Compensation siamna hming tumtu, ram neitu dik tak mi 8 te chuan cheng khat mah an chang ve lo thung a ni.

Helai ram lak tur chungchang hi MNF sorkar huna engkim tih fel vek tawh anga Pu TBC Lalvenchhunga'n a sawi chu thudiklo a ni tih sawiin Pu Lalruatkima chuan, MNF sorkar hma atang tawhin Indian Airforce te hian Mizoramah ram lak tur an dap tan tawh a, Central sorkar leh state sorkar indawr tawnnaah ram lak tur an dap kual lo remtihsak chu kalphung pangngai a ni a, Dan hnuaia ram lak/hralh tura hmalak bultanna tak tak chu Preliminary Notification chhuah atangin a intan chauh a, chu chu ZPM sorkarin nikum May ni 15 ah a ti chhuak a, ram lakna Dan dinglai nasa taka bawhchhe chung leh, Mizoramin inhung bikna dan an neihte phe chu en kan vekin, a chak thei ang bera bawhzuiin rang takin ZPM sorkar hian a hralh fel a ni a ti.

MNF Treasurer chuan, ZPM party-in midang aia tha bik, dik bik leh fel bik tur a mipui hma a nasa taka an inzawrh hnua Mizorama ram lei chungchang thil diklo liantham tak a thleng ta mai chu a zahthlak a ti a, hmanhmawh tak leh hnawhsarum taka hma lak a nih dan en hian sorkar thuneitu sang atanga nawrna a na hle tih a Chiang a, CM leh sorkar thuneitute hi thuk takin an inrawlh ngei niin a lang a ti a. ZPM sorkar hnuaiah Zoram a him lo tih sawiin FCAA 2023 hman an duh chhan a lo Chiang chho zel a ti a, MNF chuan engtik lai pawhin lepse an in huam tih sawiin CBI kuta General Consent pe anga an insawi ang ngeiin chhuitir se an duh thu a sawi bawk.

<><><>

ZPM PRESS CONF

ZPM Thalai Headquarters President Pu Jeje Lalpekhlua chuan ZPM sorkar chhung chu Mizoram chhunga chhiattawkte ruang phurhna scheme kalpui an tum a ti.

Vawiin khan ZPM Thalai Headquarters hotute chuan Aizawl Press Club-ah chanchinbumite kawmin Pu Jeje-a chuan Sorkar hmasa hunlai khan ruang phurh chu MLA Candidate leh party-te in elna pakhat, politics khelhna chikhat thin a ni a, ZPM Party lo pian tirh phat atangin tha tih lohna a lian hle tih ZPM Thalai President chuan a sawi a, hei vang hian Policy-ah ruang phurh hi dahin, sorkar thar siam a nih velah Social Welfare Department chuan hma a la nghal tih a sawi ani.

(BYTE)

Tun dinhmunah state chhungah ruang 1680 ZPM Sorkar chuan a phurh sak tawh tih sawiin, ruangphurh na atan hian Cheng vbc 1 nuai 75 sing 8 & 6,602 a hmang tawh a, tunah hian ruang phurhna bill 80 process mek niin, he scheme hi ZPM Sorkar chhung chuan kalpui chhunzawm zel an tum thu a sawi.

Pu Jeje Lalpekhlua chuan Mizoram Universal Health Care Scheme chungchang pawh sawiin, MUHCS chu Mizoramah April Ni 1, 2025 atanga kalpui

ani a, kumin January thla thleng hian Damlo 68,022 enkawl niin, an senso Vbc 115.25 pawh sorkar chuan a pe tla tawh tih a sawi bawk.

MUHCS hnuaiah Mipui nawlpui tan kum 1-ah Chhungkaw 1 tan Cheng nuaihnga thleng a bill theih bakah, Sorkar in Cashless Policy kalpui thei turin Sorkar Hospital, Kohhran Hospital leh Private Hospital ram chhung leh ram pawn thlengin thawhpui a nei a, a lawmawmin mipuite tan a thlamuan thlak hle a ni tih an sawi.

Pu Jeje Lalpekhlua chuan state pumah Grace Period September ni 16, 2025 thleng a MUHCS -a inziak lut hi Chhungkua 20,198 an awm a, an zinga 17705 chu General ward hnuai an ni a, Semi Private ward hnuai ah Chhungkua 1602 leh Private ward hnuaiah 891 an awm a ti a. MUHSC- ah hian Sorkar hnathawk leh an chhung te, Sorkar hnathawk Pensioners, Sorkar hnathawk Pension chhung te leh ABPM-JAY (Golden Card nei) te thun luh sa an ni. Pu Jeje-a chuan mipui hriselna atan a insenso hi ZPM Sorkar hian a hreh dawn lo a ti a, Sawrkar hmasa te angin damlote bill hi rei tak tak bat a la awm lova, Cashless nilo, Bill ngai te pawh reilo teah a la pe tla zel a ni, a ti.

<><><>

AIR NEWS

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve ah Chanchinthar puan leh a ni ang.

<><><>

PM

Prime Minister Narendra Modia chuan vawiin khan Rozgar Mela-ah sawrkar department hrang hranga hna hmuhthar thalai mi sing 6 leh sang 1 chuangte hnenah vawiin hian appointment letter a hlan. Thusawiin Prime Minister Modia chuan thalaite tan ramchhung leh rampawnah hna zawnsakin theihtawp a chhuah a ti a. India chuan sumdawnna leh inkalpawhna kawngah ramdangte nen thawkhoin thalaite thiam thil ti hmansawn turin kawng hrang hrangin hma a la a ti bawk.

(Byte)

Rozgar Mela vawi 18-naah hian Video conference hmangin Pu Modia hian hun a hmang a. Ramchhung hmun 45 ah a rualin an lo chhim a. Tun tum Rozgar Mela-a hna hmu thar te hi sawrkar laipua Ministry of Home Affairs, Ministry of Health and Family Welfare, Department of Financial Services, leh Department of Higher Education leh department dangte an ni.

<><><>

ROZGAR MELA

Rozgar Mela chu vawiin khan Gajraj Hall Lammual-ah neih niin, mi 40-in hna a kohna lehkha, appointment letter an dawng.

Ramchhung hmun 45-a neih Rozgar Mela hi biakhmuhtheihna kaltlangin Prime Minister Narendra Modi an a tel puia, sawrkar hna thar thawk tura thlan thalaite hnenah appointment letter a hlan a ni.

Lammual a hun hmanna ah hian 23 Sector Assam Rifles DIG Brig. Pushpendar Sorayan chuan thu sawiin, thalaite chu nakina ram hruaitu tur an nih avangin rilru hrisel leh fim tak put a pawimawh thu a sawi a, hna thar hmu te chu lawmpuina hlanin, hetiang dinhmuna hlang kaitu an nu leh pa te chu hre reng turin a chah a. Prime Minister Modi hmalakna avangin ram pum hmun 45-ah he Rozgar Mela hi neih a ni tih sawiin, thalaite chu rinawm leh taima taka thawk turin a chah bawk.

Mizoram atanga hna kohna pek mi 40 te chu Assam Rifles, BSF, CRPF leh CISF-ah te an thawk dawn a ni.

<><><>

PM VISHWAKARMA

PM Vishwakarma Haat 2026 chu New Delhi ah neih mek a ni a. He exhibition ah hian ramchhunga kut themthiam leh thiamthil hrang hrang neiten an thil siamte an pholang a. He hunah hian ramchhung leh rampawn atanga exhibition rawn tlawhtuten an thilsiamte hi an lei sak a. State leh Union Territory atangin mi 117 in an thilsiam an pholang a ni.

<><><>

PM MANN KI BAAT

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 129-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

<><><>